

玄覽堂叢書續集

第二十八冊

中國經濟發展史 卷二十一

總督四鎮奏議卷之九

議處不善撫恤新軍疏

題為重責成嚴清勾以實行伍事據密雲等道兵
備叅政等官郭四維等各將所屬萬曆十四年
各營路見在及逃故軍士分數與本管將領千
把總等官職名造冊呈報到臣據此卷查先准
兵部咨該前督撫侍郎楊 等會題內議原差
清軍御史清解過薊昌兩鎮軍數若各營衛將
領千把總等官不善撫恤致有逃亡者每年以



十分為率如逃故軍士二分以下者附過三分
以下者降一級五分以下者降二級分別具
奏永為定例等因本部議覆題奉

欽依備咨節年欽遵訖萬曆十四年該臣會同撫臣
蹇 題前事本部議覆今後各營路衛所管軍
官員原領新軍必係十名以上若有逃亡方計
分數然降十名以下逃亡不計分數止行革任
差操等因節奉

聖旨逃軍降革事例依擬欽此備咨前來隨經通行

欽遵及於萬曆十四年終通行各兵備道查取
各營路衛所將領等官逃故新軍分數去後今
據前因該臣會同整飭薊州等處邊備兼巡撫
順天等府地方都察院右僉都御史蹇 議照
薊昌兩鎮邊長兵寡先年建議清勾額軍以實
行伍各軍遠離鄉井從事邊塞全在本管將領
千把總等官加意撫摩方免逃徙邇來

明例森嚴人心各知警畏今查得各道冊開各營路
衛所將領等官名下收伍新軍全無逃故者十

之二三其有逃故二分以下者俱應附過各官
有陞遷降調病故革任者俱免追究惟三屯車
後營左部名色千總高惟精原有募兵八百四
十名見在六分以上五百八名逃故三分以上
三百三十二名一司把總遵化衛百戶范崙原
有募兵二百一十名見在七分一百四十二名
逃故三分六十八名二司把總興州右屯衛總
旗胥信原有募兵二百一十名見在四分以上
一百一名逃故五分以上一百九名三司名色

把總陳文桂原有募兵二百一十名見在七分
一百四十一名逃故三分六十九名四司把總
綏德衛納級百戶鄭杰原有募兵二百一十名
見在六分一百二十四名逃故四分八十六名
右部千總金吾衛納級鎮撫胡有時原有募兵
八百四十名見在五分以上四百七十五名逃
故四分以上三百六十五名一司名色把總楊
森原有募兵二百一十名見在六分以上一百
三十一名逃故三分以上七十九名二司名色

把總高如桐原有募兵二百一十名見在六分
以上一百三十九名逃故三分以上七十一名
三司名色把總俞貴原有募兵二百一十名見
在四分以上一百名逃故五分以上一百一十
名四司把總榆林衛鎮羌所總旗高鸞原有募
兵二百一十名見在五分一百五名逃故五分
一百五名以上各官俱應參降內范崙應降實
職一級胥信高鸞應降實職二級鄭杰胡有時
係納級高惟精陳文桂楊森高如桐俞貴係名

色皆無職可降俱應革斥除將各營路衛所將
領及中軍千把總等官名下原有新軍并全完
及逃故分數遵照節年事規備造青冊咨送兵
部查考外相應具

題伏乞

勅下該部覆議將范崙等分別降級候各官補足軍
額另

題議復鄭崙等高惟精等行臣等革斥以為不善
撫馭軍士者之戒其餘各官撫恤有方軍士全

無逃故者容臣等分別量行獎勵庶懲勸有法
而行伍漸充矣緣係重責成嚴清勾以實行伍
事理未敢擅便為此具本專差千戶張大庸親
齎謹題請

旨

萬曆十五年三月 二十七日

兵備患病乞休疏

題為兵備官員患病乞休事准整飭薊州等處邊
備兼巡撫順天等府地方都察院右僉都御史
蹇 會稿據霸州道兵備副使田時秀呈為患
病不能供職乞准回籍調治事照得本職由進
士萬曆五年除授戶部山西清吏司主事八年
陞本部陝西清吏司署郎中總理延寧糧儲十
一年填補本司郎中十三年三月內陞授今職
自分資性疎庸才力綿薄欲求無負任使銳志

勉修職業是以朝夕兢惕不暇寢食勞思過度
精力耗傷適於萬曆十四年六月二十八九等
日巡歷道屬郡縣比緣天時酷暑不意感患濕
熱至七月初二日行至武清縣河西務地方一
時風痰陡作口眼欹斜暈眩難支旋即扶病回
道倩醫調治幸而旬日之外漸次平復即欲告
病休歸因思年當強仕尚圖報效詎料萬曆十
五年二月十四日正值公座僉押忽然前疾復
發昏暈倒地急進醫生宋錦宗堯臣灌藥調理

兩日方甦見今右肢不能舉動舌強艱於語言
病勢十分危篤軀命未卜保全顧此藩臬之司
一方庶政所關難以曠廢懇乞准賜回籍調理
或容致仕還鄉得以靜養苟延皆出再造之恩
矣等因到職除詳批准令在任調理及行昌平
道兵備右叅議于達真暫行帶管該道印務并
覆勘副使田時秀果否患病去後隨據叅議于
達真回稱本官委係真病別無虛偽等因據此
卷查萬曆八年十一月內准吏部咨為申飭告

病官員事例以明臣職以安地方事該本部題
合候

命下通行各省直撫按官凡遇在外官員告病乞休
果係真疾照依舊例將本官經管事務別委相
應官署掌即為代

奏容本部訪其素履酌量題

請不許自行陳乞等因題奉

欽依備咨准經通行遵照在卷今據前因會稿到臣
該臣會同整飭薊州等處邊備兼巡撫順天等

府地方都察院右僉都御史蹇 巡按直隸監
察御史任養心看得霸州道兵備副使田時秀
任勞任事有守有為殫心思以撫災民而士庶
頌服竭籌策以除巨盜而遐邇肅清操行可質
神明才識允堪艱大

畿輔要地倚藉弘多乃以道事繁難因勞致疾情
甚可憫既稱一時亟難痊可似應准令回籍調
理而本官年力正強遽使退閑又深可惜相應
題

請伏乞

勅下吏部再加查議合無暫准本官致仕回籍就醫
調理痊可之日候有相應員缺仍行推用以盡
其才庶野無遺賢而忠勤亦知所勸矣再照霸
州當水陸軍民之衝事體既繁兼稱多盜兵巡
官員干係尤重乞併

勅該部查選素有才望者推補前缺或就近陞調地
方幸甚緣係兵備官員患病乞休事理未敢擅
便為此具本專差千戶張大庸親齎謹題請

旨

萬曆十五年三月三十日